



birayeti

Bayram Ayaz

Edaleta Tirkan edaleta „devê tîfîngê“ ye

Gotinek me ê pêşiya heye, dibêje; „Zêr zane, zor zane, devê tîfînga mor zane“. Zêr nişana dewlemendiyê, zor ya desthilatîyê ye. Devê tîfînga mor jî qudreta çekdaran e. Her çiqasî em di çaxekî modern de dijîn û maf û edalet divê bi ser her tiştî re be, lê xuyaye îro jî li dewletên wekî Tirkîyê devê tîfînga mor xwediyê her tiştî ye! Hela dema mijar Kurd be, edalet medalet qet nayê bîra kesî!

Tiştê bi serê dawa Şemzînan û serê Sawciyê Wanê hat ev e. Generalên Tirk devê tîfîngê nişan dan! Li Şemzînan zilamên wan nava rojê û li pêş çavên xelkê çûn bombe avêtin dikana Kurdekî welatparêz. Xelkê xwe avêt nav agir û her sê provakator girtin. Hemî tişt aşkere bû. Sawciyekî ciwan xwedî wijdan dawa vekir. Çi bû? Generalan yekser „devê tîfîngên xwe“ dan ser Hikûmetê, Sawcî û hêzên demokrat. Sererkaniya leşkerî nehişt li dijî generalan dawa vebe. Hikûmetê bi paşde gav avêt. Midûrê Îstixbarata Emniyetê Sabri Uzun ku îşaretî gunehkariya leşkeran kiribû, ji kar girtin. Belengazê Sawcî jî di nav dest û lepê generalan de maye! Di derheqê wî de jî taşqîqat berdewam e, dibe ku wî jî ceza bikin!

Vê bûyerê carek din rengê rejîmê nişan da: Li Tirkîyê xwediyê gotinê hê jî general in û rejîm rejîmek leşkerî ye. Astengiya sereke li pêşiya demokrasiyê û çareseriyê doza Kurdistanê ev e. Divê em li gorî vî rastiyê dost û dijminên xwe û şeweyê xebatê û tifaqan diyar bikin. Ji meha tebaxê pê de di nav ordiyê de grûba Tirkçî -Kemalîst xurttir dibe, hefsar dikeve destê Yaşar Büyükanit+Fevzî Türkeri+Ilker Başbuğ. Divê em xwe amade bikin.

Mijar gelek in, mirov pê re nagihê gişan binivîse. Vê hefte bi kurtî çend babet.

Rojeva Tirkan niha Kerkûk e! Kurdino ha jê hebin!

Oligarşiya Tirk vî hêlê bi pîrsa Kerkûkê ve mijûl e. Tirk ji rewşa Kerkûkê dizarin, carna jî gefan dixwin, dixwazin sala bê li Kerkûkê pêşî li referandûmê bigrin. Ew dibêjin, eger Kerkûk bikeve ser Herêma Kurdistanê dê bîngeha aborî ji bo Dewleta Kurdistanê peyda bibe!

Şahiya DTPê NEWROZ bû an „nevrûz“ ?

Rejîma Kemalîst dixwaze hêjayiyên gelê Kurd pûç bike. Yek ji van armançên wê têkdana NEWROZê ye. Tirkan navekî nû lê kirine: Ergenekon Bayramî-Nevruz! Ev çi ye? Şahiya bê Kurdewarî, bê ala û nişanên Kurdistanê. Di şahiya DTPê de wêneyên Barzanî, Qadî Muhemed, Şêx Saîd, Seyîd Rizo, Alîşêr, Xalid Cibran, Dr. Fuad, Mazlum, Ferhad, Egît, şehîdên Qamişlo tunebûn! Navê şahiya îsal Newroz bû. Eger em lê şiyar nebin, ditirsim sala bê bi emirnameyek îmraliyê navê NEWROZê ji bibe nevrûz. Hêj wexta me heye! Min bawerî bi Kurdbûna wan sed hezaran heye, ku ew dê nehêlin Newrozê bikin nevrûz!

Keç û xortên me nedin kuştin!

Ji me re dibêjin dema gerillayên pkê tînan kuştin, hûn bêdeng dimînin. Ne rast e, ev bêbextî ye. Bi salane zare zara me ye, lê goh nadin rastiyên. Em dibêjin: Bes e, keç û xortên Kurdan nedin kuştin! Bila Kurdistan zêdetir wêran nebe. Ji bo çi? Hûn dewlet, federasyon, otonomî navên! Û jibo *unîter demokratîk cumhuriyetê* jî ne hewce ye keç û xortên me canê xwe bidin.

Salman Ruşdiyekî me jî çêbû!

Nivîskar Merwan Helepeçyî jiber pirtûka xwe bû pêneber. Alozi û zehmetiyên Kurdistanê azad dizanim, belkû nika-ribin M. Helepeçyî biparêzin. Lê cardin jî bi min zor e, ku Salman Ruşdiyek me Kurdan jî çêbû! Bûyereka din jî, hemwelatîyê Efxanistanê Ebdul Rahmanê misilman jiber ku dîne xwe guheriyê bûye mesîhî jiyana wî ketiye ber xeterê. Ev çi hal e, çi bi serê mirovayetiye û medeniyetê hatiye? De baş e, werin em mesihiyên bûne misilman jî hema bikujin! Ev oldariyek maqûl nîne, ev bîr û hizre fanatîzm e, rêz li jiyana insan negirtin e.

Yekîtiya Ewrûpa Kurd weke gelê diwemîn li Tirkîyê nas kir

Piştî xebateke demdirêj û bêrawestan ya ku ji aliyê dîplomaten Kurd ve hat kirin, Yekîtiya Ewrûpa bo cara yekemîn Kurd weke gelê diwemîn di organa xwe ya ragihandinê ya fermî de nas kir û bi saya Kurdan kêmetewên din jî yên weke Qewqasî, Bosniyak û Erebbî, hatin nasandin.

Malpera Komîsyona Ewrûpa ku organa fermî ya ragihandinê ye û agahdariyan li ser welatên berendamên YE belav dike, heta berî mehekê jî cih nedida hebûna gelê Kurd û ya kêmetewên din li Tirkîyê. Bi tenê gelê Tirk û zîmanê Tirkî nasdikir.

Ji bo serrastkirina vî neheqiyê û nasandina Kurdan ev nêzikî du salan bû ku Hevbendîya Demokratîka Kurdên Bakur bi bîdengî li ser vî yekê karê dîplomasiyê dimeşand û hewl dida ku Kurd weke gelê diwemîn li Tirkîyê, ji aliyê YE ve, bêne nasandin û di malperê û belgeyên fermî yên Yekîtiya Ewrûpa de cih bigirin. Di encama vî xebatê demdirêj de, Yekîtiya Ewrûpa di organa xwe ya fermî de cih da hebûna gelê Kurd. Ji bo wergirtina agahdariyên berferêh yên di derbarê mijarê de me serî li nerînan Serokê Hevbendîya Demokratîk ya Kurdên Bakur Dr. Musa Kaval da. Di pêwendiyêke telefonî de Kaval da zanîn ku wan weke Hevbendî xebateke demdirêj ji bo vî guherîna kirine, lê wan tucaran deng ji xwe dernexistiye û her bi bîdengî xebitîne. Dr. Musa Kaval dibêje, “Di vî derbarê de du konsept hebûn. Yek jê konseptê Tirkîyê bû ku digot, li Tirkîyê bi tenê Tirk hene û Kurd jî hemwelatîyên Tirkîyê yê kokkurd in. Wê dixwest vî nerîna bi Yekîtiya Ewrûpa jî bide pejirandin. Ev konsept jî bo Kurdan pir xeter bû. Ev dihat wê wateyê ku Kurd ne xwediyê tu taybetmendiyên dîrokî, çandî û zîmanî ne. Ew hemwelatîyên Tirkîyê yê kokkurd in. Li gora vî konseptê tu ferq di navbera Kurdekî û mihacirekî de tune bû. Mixabin hinek aliyên Kurdan jî



ev konsept pejirandibûn û Yekîtiya Ewrûpa jî bê teref mabû. Me du salan bi riya hevdiyanan, bi riya nameyan, bi riya nivîsaran li dijî vî konseptê xebat kir. Me da zanîn ku ev konsept ne di xizmeta ewlekarî û îstîqrarê de ye û xeter e”. Dr. Musa Kaval dide zanîn ku wan ev yek di Beyana Parisê de jî anîbûn zîman. Ji bo vî yekê wan gelek caran xwe gihandine Serokê Yekîtiya Ewrûpa û temamê rayedarên payebilind yên Yekîtiyê. Her wiha wan temamê Wezîrên Karûbarên Derve yên her 25 welatan agahdar kirine û gelek dostên parlamenter xistine nava hewldanê. Li gora daxuyaniya Dr. Musa Kaval temamê belgeyên vî xebatê li cem wan amade ne, lê ew nikarin belav bikin ji ber ku belavkirina wan tiştêkî ne li gora îsûlên dîplomasiyê ye.

Me ji Dr. Musa Kaval pirs kir ka gelo Tirkîyê li beramberî vî guherîna nerazîbûna xwe nişan daye yan na. Bersiva Kaval bi vî rengî bû, “Heta niha tu reaksiyoneke fermî tune ye. Jixwe ew naxwazin bi awayekî fermî li dijî tiştêkî wiha derkevin û naxwazin ku raya giştî ji bûyereke wiha haydar bibe. Lê bi riya wezaretê xwe ya derve hinek hewldanan dikin. Ew dixwazin bi gotûbêjên li pişt perdeyan vî pirsgerêkê çareser bikin û rê li ber belavbûna wê bigrin. Lê heger ew di nava raya giştî de were gotûbêjkirin, Tirk nema dikarin rê li ber bigrin. Ji ber vî yekê girîng e ku çapemenî û ragihandina Kurdî vî guherîna belav bike û gotûbêjê li ser veke. Divê em vî yekê tîxin rojeva raya giştî ya Kurd û Ewrûpî”.

Dengê dozgeran jî dibirin

PK - Mufetişên ku bi destûra Wezîrê Adaletê Cemil Çiçek jibo lêpirsîna Dozgerê Komarê yê Wanê Ferhat Sarikaya hatibûn wezîfedarkirin, di 28ê mehê de lêpirsîna xwe ya li Wanê temam kirin û vegeriyên Anqerê. Mufetiş di rapora xwe de jiber du lebatên wî cezayê

disiplînê jibo dozger Sarikaya dixwazin.

Li gora raporê lebatên ku Sarikaya pê te suçdar kirin ev in: “Di doznamê de bicikirina hinek taybetmendiyên ku li gora Zagona Dadgerîna Cezayê pêwîst bû nehata bicikirin” û “Nivîsarek ji bo Femandariya Alaya

Cendirmeyan ya Bajêr”.

Di raporê de jibo van herdu libatan li gora Zagona Dadger û Dozgeran ji Sarikaya re cezayê disiplinê tê xwestin, lê biryara cureyê cezayê ku were dayîn ji Heyeta Bilind ya Dadger û Dozgeran re hatiye hiştin.

Li gora Zagona Dad-

ger û Dozgeran, girêdayî naveroka suçê ku hatiye kirin, ew dikarin cezayê “hişyarkirinê”, “şermezarkirinê” û “dûrxistina ji kar” li dadger û dozgeran bibirin.

Biryara dawî ya li ser lêpirsînê ewê Heyeta Bilind ya Dadger û Dozgeran bide.